

影刊宋金元明本詞

第十冊

影刊宋金元明本詞

PDG

景宗本石屏詞一卷

同生同死
同生同死
同生同死

石屏長短句

天台戴復古式之

滿江紅

赤壁懷古

赤壁磯頭一番過一番懷古想當時周郎年少
氣吞區宇萬騎臨江貔虎噪千艘列炬魚龍怒
卷長波一鼓困曹瞞今如許

江上渡江邊路形勝地興亡處覽遺蹤勝讀史
書言語幾度東風吹世換千年往事隨潮去問
道傍楊柳爲誰春搖金縷

水調歌頭

送竹隱知郢州

鵬鶚上雲漢虎豹守天關
官游戲笑向古郢
試朱轡天下封疆幾郡盡得公爲太守奉詔仰
天寬萬物一吐氣千里賀平安

雪樓高三百尺玉欄干政成無事時復把酒對
江山問訊莫愁安在見說風流宋玉猶有屋三
間請和陽春曲留與世人看

沁園春

一曲狂歌有百餘言說盡一生費十年燈火讀
書讀史四方奔走求利求名蹭蹬歸來閉門獨
坐贏得窮吟詩句清夫詩者皆吾儂平曰愁嘆

之聲

空餘豪氣崢嶸安得良田二頃耕向臨邛滌器
可憐司馬成都賣卜誰識君平分則宜然吾何
敢怨螻蟻逍遙戴粒行開懷抱有青梅薦酒綠
樹啼鶯

賀新郎

爲真玉堂壽

說與黃花道九秋深三光五嶽氣鍾英表金馬
玉堂真學士蘊藉詩書奧妙一一是經綸才調
斟酌古今來活國筭忠言讜論知多少又入奏
金門曉

朝回問寢披萱草對高堂長說一片君恩難
報更待癡兒千載遇膝下十分榮耀趁綠鬢朱
顏不老整頓乾坤濟時了奉板輿拜國夫人號
可謂忠可謂孝

又寄豐真州

憶把金壘酒嘆別來光陰荏苒江湖宿留世事
不堪頻着眼贏得兩眉長皺但東望故人翹首
木落山空天遠大送飛鴻北去傷懷久天下事
公知否

錢塘風月西湖柳渡江來百年機會從前未有

喚起東山丘壑夢莫惜風霜老手要整頓封疆
如舊早晚樞庭開幕府是英雄盡爲公奔走看
金印大如斗

又豐真州建江淮偉觀樓

百尺連雲起試登臨江山人物一時俱偉旁挹
金陵龍虎勢京峴諸峯對峙隱隱接揚州歌吹
雪浪舞從三峽下乍逢迎海若談秋水形勝地
有如此

使君一卅經綸志把風斤月斧來此等閑游戲
見說樓成無多日大手一何容易笑天下紛紛

血指醞釀春風與和氣舉長江變作香醪美人
共樂醉桃李

水調歌頭

題李季允侍郎
鄂州吞雲樓

輪奐半天上勝槩壓南樓籌邊獨坐豈欲登覽
快雙眸浪說曾吞雲夢直把氣吞殘虜西北望
神州百載一機會人事恨悠悠

騎黃鶴賦鸚鵡謾風流岳王祠畔楊柳煙鎖古
今愁整頓乾坤手段指授英雄方略雅志若爲
酬杯酒不在手雙鬢恐驚秋

滿庭芳

楚州上巳萬柳
池應監丞領客

三日春光群賢勝踐山陰何似山陽鵝池墨妙
曲水記流觴自許風流丘壑何人共擊楫長江
新亭上山河有異舉目恨堂堂

使君經世志十年邊上兩鬢風霜問池邊楊柳
因甚淒涼萬樹重新種了株株在桃李花傍仍
須待賸栽蘭芷爲國洗河湟

又

赤壁磯頭臨臯亭下扁舟兩度經過江山如畫
風月柰愁何三國英雄安在而今但一目煙波
風流處竹樓無恙相對有東坡

登臨還自笑狂遊四海一向忘家筭天寒路遠
早早歸呵明日片帆東下滄洲上千里蘆花真
堪愛買魚沽酒到處聽吳歌

醉落魄

九日吳勝之運使黃鶴山登高

龍山行樂何如今日登黃鶴風光政要人酬酢
欲賦歸來莫是淵明錯

江山登覽長如昨飛鴻影裏秋光薄此懷祇有
黃花覺牢裹烏紗一任西風作

柳梢青

岳陽樓

袖劒飛吟洞庭青草秋水深深萬頃波光岳陽

樓上一快披襟

不須携酒登臨問有酒何人共斟
變盡人間君山一點自古如今

錦帳春

淮東陳提舉清明奉母夫人游徐仙翁庵

處處逢花家家插柳政寒食清明時候
奉板輿行樂使星隨後人間稀有

出郭尋仙繡衣春晝馬上列兩行紅袖
對韶華一笑勸國夫人酒百千長壽

行香子

永州爲魏深甫壽

萬石崔嵬二水漣漪此江山天下之奇
太平氣

象百姓熙熙有文章公經綸手把州麾
滿斟壽酒笑撚梅枝管年年長見花時佳人休
唱淺近歌詞讀浯溪頌愚谷記澹巖詩

鵲橋僊

新荷池沼綠槐庭院簷外雨聲初斷喧喧兩部
亂蛙鳴怎得似啼鶯睨睨

風光流轉客游汗漫莫問鬢絲長短即時杯酒
醉時歌筭省得閑愁一半

木蘭花慢

鶯啼啼不盡任燕語語難通這一點閑愁十年

不斷惱亂春風重來故人不見但依然楊柳小樓東記得同題粉壁而今壁破無蹤

蘭皋新漲綠溶溶流恨落花紅念着破春衫當時送別燈下裁縫相思謾然自苦筭雲煙過眼總成空落日楚天無際凭欄目送飛鴻

洞僊歌

賣花檐上菊藥金初破說着重陽怎虛過看盡城簇簇酒肆歌樓柰沒箇巧處安排着我

家鄉煞遠哩抵死思量枉把眉頭萬千鎖一笑且開懷小閣團圓藥旋簇着幾般蔬菓把三杯兩

石屏詩
六
盞記時光間有甚曲兒好唱一箇

西江月

宿酒纔醒又醉春宵欲雨還晴柳邊花底聽鶯聲白髮莫教臨鏡

過隙光陰易去浮雲富貴難憑但將一笑對公卿我是無名百姓

又

三過武昌臺下却逢三度重陽菊花祇作舊時黃白雪堆人頭上

昨日將軍亭館今朝陶令壺觴醉來東望海茫